

24.09.2018.

BPK dobio Investicioni profil i E-registar; vrijeme rješavanja administrativnih zahtjeva u prosjeku skraćeno za 36%



Danas su predstavljeni rezultati Projekta privlačenja investicija i unapređenja poslovnog okruženja na lokalnom nivou – LIFE, kojeg je Međunarodna finansijska korporacija – IFC, članica Grupacije Svjetske banke, provela zajedno sa Vladom Bosansko-podrinjskog kantona, uz podršku Britanske ambasade u BiH. Uspješnom realizacijom projekta LIFE, građani i investitori sada imaju brži, lakši i transparentniji pristup administrativnim uslugama u BPK, što će značajno unaprijediti kvalitet života i ubrzati redovno poslovanje kompanija u ovoj regiji.

Ovom prilikom pokrenut je Elektronski registar Vlade BPK, koji je rezultat procesa usklađivanja svih regulatornih procesa koje provodi kantonalna administracija. E-registar omogućava da građani i privrednici na jednom mjestu jednostavno dobiju informaciju kojem kantonalnom organu trebaju podnijeti željeni zahtjev, koju dokumentaciju treba da prilože, te koliko će postupak koštati i u kojem će roku biti riješen. E-registar omogućava preuzimanje odgovarajućih obrazaca i zahtjeva i dostupan je na službenoj web-stranici <http://bpkg.gov.ba/>.

Također, projektom LIFE uspostavljen je sistem servisiranja investitora, gdje su detaljno analizirane investicijske mogućnosti Bosansko-podrinjskog kantona, što uključuje analizu i pripremu konkretnih lokacija za investiranje, njihove potencijale i konkurentne prednosti, te kakvu podršku kantonalne uprave investitor može očekivati u procesu realizacije investicije. Navedene informacije sadržane su u Investicionom profilu koji je također dostupan na http://www.bpkg.gov.ba/media/images/2018/06/Inv.profil-BPK-Gorazde_WEB_June-22-18_FINAL_BHS-1.pdf.



Radi jačanja transparentnosti prema investitorima, osim Investicionog profila, od danas, na službenoj internet stranici Vlade BPK dostupna je i ažurna lista kantonalnih poticaja, koja omogućava istovremeno informisanje i ravnopravnu utakmicu između svih privrednih subjekata u ovom kantonu, što je značajan iskorak u povećanju transparentnosti i pravne sigurnosti u radu kantonalne administracije.

Ubrzanjem postupaka i skraćanjem rokova u prosjeku za 36%, kantonalna administracija će zahtjeve stranaka rješavati brže, rješavanje pojedinačnog zahtjeva će, u prosjeku, trajati 4 dana kraće. Unapređenje predvidivosti rješavanja postupaka i njihovim skraćanjem investitori će kumulativno imati značajno manji trošak, te se očekuje veća investiciona konkurentnost BPK. Uštede u vremenu su ostvarene eliminacijom dokumenata ili njihovim pribavljanjem po službenoj dužnosti, promjenom forme dokumenata, te skraćanja ukupnog vremena potrebnog za kompletiranje i rješavanje potpunog zahtjeva investitora ili građanina.



Autor: Služba za odnose s javnošću, www.bpkg.gov.ba